



ZARAUZKO UDALA

## ZARAUZKO UDALEKO GARAPENERAKO LANKIDETZAREN ETA HEZKUNTZAREN AHOLKU-BATZORDEAREN ERREGELAMENDUA

### ZIOEN AZALPENA

Zarauzko Udalak urteak daramatza Garapenerako Lankidetzan lanean, beti ere herriko elkarten sare solidarioarekin elkarlanean eta koordinatuta.

Nazioarteko lankidetzan eta garapenerako hezkuntzan Udalak egiten dituen jarduerak ondorengo bi printzipioetan oinarritzen dira batez ere:

- Justizia sozialeko kontu bat da lankidetzaren berdintasunean eta tolerantzian oinarritzen diren elkarbizitza baketsurako baloreak sustatzen ditu, eta horrek aukera ematen du Iparraldearen eta Hegoaldearen arteko harremanen egitura aldatzeko, betiere pertsona guztientzat giza-garapen jasangarriaren ikuspuntutik abiatuta. Atzerrian ez ezik, bertako herritarren artean ere sustatzen dira balio horiek, eta horrek lagundu egiten du munduan dagoen desberdintasun sozialari buruzko hausnarketa kritiko bat egiten.

Horregatik guztiagatik, garapen-bidean dauden herrialdeetan egiten diren lankidetzaprogramekin batera, garapenerako hezkuntza-programak ere egiten dira udalerrian bertan.

- Zeregin hori herriko elkarten sare solidarioarekin elkarlanean eta koordinatuta egingo du Udalak. Zarautzen errotuta eta finkatuta dagoen elkartasun sare bat osatzen dute elkarte horiek, eta dagoeneko erakutsi dute oso gauza direla mobilizatzeko eta gauzak antolatzeko.

Garapenerako lankidetzan eta hezkuntzan Udalak egiten duen politikan elkarte horiek parte hartzea da Udal honen borondatea, eta parte-hartze hori iraunkorra izateko bitartekoak jarriko ditu. Eta hori guztia maiatzaren 12ko 6/2016 Legeak, Euskadiko Hirugarren Sektore Sozialari buruzkoak, 6 d) artikuluan xedatutakoarekin bat etorrira:

*“Euskal administrazio publikoek Euskadiko hirugarren sektore sozialerako erakundeei eta sareei bermatuko diete Administrazioaren jardun-esparru guztietan beren iritzia publikoki elkarri adierazteko eskubidea, eta erakunde eta sare horiekin elkarrizketa irekia, gardena eta ohikoa izango dute politika sozialaren gainean; horretarako, elkarrizketa zibileko mahaiak abiaraziko dituzte, eta kontsulta organoetan edo horretarako abiarazitako prozesu espezifikoen parte hartuko dute.”*

Eta helburu horrekin sortuko du udal batzordea.

### 1.- IZAERA ETA KOKAPENA

Zarauzko Udaleko Garapenerako Lankidetzaren eta Hezkuntzaren Aholku Batzordea herritarren parte-hartzea bermatuko duen organo aholku-emaile iraunkorra da.

Garapenerako lankidetzan eta hezkuntzan Udalaren jarduerak kontrastatzea, definitzea eta horien jarraipena egitea izango dira bere egitekoak.

Batzorde horretan hartutako erabakiak aintzat hartzeko konpromisoa hartzen du Udalak, baina erabaki horiek ez dira inolaz ere lotesleak izango.

Erregelamendu honek eta aplikatzekoak diren gainerako xedapenek arautuko dute Batzordea.

## 2.- FUNTZIOAK

- Udalaren eta arlo honetan lanean diharduten elkarte sozialen artean solasaldi zuzena eta iraunkorra ezartzea.
- Eztabaida-leku bat edukitzea elkarte horiek beren proposamenak, iradokizunak, eskaerak, kezak edo kexak helarazteko Udalari.
- Udalek eta elkarte sozialek herrian egiten duten sentsibilizazio-lana koordinatzea, bikoiztasunak saihestea eta baliabideak optimizatzea.
- Garapenerako lankidetzan eta hezkuntzan Udalaren jarduna nolakoa den aztertzea, eta jardun horri buruzko hausnarketa eta jarraipena egitea.
- Udalak diruz laguntzen dituen proiektuen jarraipena etengabe egitea.

## 3.- OSAKETA

Zarauzko Udaleko Garapenerako Lankidetzaren eta Hezkuntzaren Aholku Batzordeak gutxienez 9 kide izango ditu, arlo horretako herriko elkarte ezberdinak ordezkatzeko. Hala ere, batzordekide-kopuru maximorik ez da egongo. Horrela, bada, garapenerako lankidetzan lanean diharduten Zarauzko elkarte guztiek eta gai horretan esperientzia eta interesa daukaten pertsona guztiek parte hartu ahalko dute Batzorde honetan.

Batzordeak ondorengo osaketa izango du gutxienez:

- Batzordekideak (gutxienez 9 kide + idazkaria)
- Batzordeburua: Zarauzko Udaleko Kooperazioko zinegotzi arduraduna
- Idazkaria: Zarauzko Udaleko immigrazio eta kultur aniztasuneko teknikaria
- 3 kide: Zarauzko GGKEen Koordinakundeko ordezkariak
- Kide 1: Gipuzkoako GGKEen Koordinakundeko kidea
- 2 kide: Inongo koordinakundetako izan gabe, herrian lan egiten duten bi GGKEtako ordezkariak
- 2 kide: Garapenerako lankidetzaren arloan Zarautzen ezagunak diren bi pertsona; indibidualki edo euren buruaren izenean parte hartuko dute bi pertsona horiek.
- Udal taldeetako ordezkari bana. Beren ordezkartzaren indarrez, ordezkari politikoek izaera galduko dute agintaldia bukatzerakoan.

Ahal den neurrian, errespetatu egingo da osaketa hori. Dena den, kategoria guztietarako jenderik ez balego, interesa duten beste pertsona batzuek parte hartuko dute Batzorde honetan.

Udaleko Berdintasun Plana aintzat hartuta, Batzordearen ordezkari itza parekidea izango da, eta emakumeak ezingo dira batzordekideen %40 baino gutxiago izan.

#### **4.- BATZORDEAN SARTZEA**

4.1. Aurreko artikuluan aipatutako elkarte eta erakundeek Batzordean sartzeko eskatu beharko dute, batzordeburuari zuzendutako idatzi baten bidez. Eskaerarekin batera ondorengo agiriak aurkeztu beharko dituzte:

- Parte-hartzea eskatzeko inprimakia, behar bezala beteta.
- Elkarte edo erakundearen idatzia, bere ordezkari itza eskatzailearen eta ordezeko pertsonaren esku uzten duela adierazten duena.

4.2. Indibidualki edo euren buruaren izenean parte hartu nahi duten pertsonak eskarmentua izan beharko dute garapenerako lankidetzaren arloan, eta ondorengo agiriak aurkeztu beharko dute:

- Parte-hartzea eskatzeko inprimakia, behar bezala beteta. Bertan, garapenerako lankidetzaren alorrean duten eskarmentuaren berri emango dute eskatzaileek.

4.3. Pertsonen edo erakundearen datuak aldatzen badira, Batzordeko idazkaritzari jakinaraziko zaizkio, aldaketak gertatzen direnetik hilabeteko epean.

4.4. Batzordean parte hartu nahi dutenek edozein momentutan egin dezakete sartzeko eskaera.

4.5. Batzordeak onartu beharko ditu bertan sartzeko eskaerak, horretarako baldintzak bete egiten direla egiaztatuta eta gero.

4.6. Batzordean gehienez ere hiru urtez parte hartuko dute batzordekideek. Denbora hori pasatu ondoren, Batzordean beste hiru urtez jarraitzeko eskaera egin ahalko dute.

4.7. Batzordean, erakunde edo pertsona partikularrek aholkulari gisa hitz egin ahal izango dute, baina botoa emateko eskubiderik ez dute izango.

#### **5.- BATZORDEKO PARTAIDE IZATEARI UZTEA**

5.1. Batzordekide izateari utziko zaio ondorengo arrazoiren batengatik:

- Norbere borondatez
- Elkarte edo erakundea desagitea
- Elkartearen edo antolakundearen ordezkari itza galtzea
- Justifikaziorik gabe bileretara ez joatea (hiru aldiz jarraian, edo guztira bost aldiz)
- Erregelamendu hau behin eta berriz ez betetzea
- Batzordekide izateko arauzko gehienezko epea bukatzea

5.2. Batzordeak hartuko du kide izateari uzteko erabakia, dagokion elkarte edo pertsonari entzun eta gero.

## **6.- BILEREN ALDIZKAKOTASUNA**

Batzordea gutxienez hiru hilean behin elkartuko da, eta baita batzordeburuak bilerarako deia egiten duen aldi bakoitzean ere.

Era berean, batzordekideen gehiengo osoak hala eskatzen duenean, Batzordeko bilera deitu ahal izango da.

Deialdiak idatziz egingo ditu Batzordeko idazkaritzak, gutxienez bilera egin baino lau egun lehenago. Deialdian, bileraren data, ordua, tokia eta gai-zerrenda agertuko dira.

## **7.- FUNTZIONAMENDUA**

- Batzordea eratu ahal izateko batzordekideen gehiengo osoa beharko da.
- Ahal dela, erabakiak denon adostasunarekin hartuko dira, eta hori ezinezkoa izanez gero, bertaratutakoen gehiengo soilez. Berdinketa gertatzen bada, batzordeburuak bozkatutako aukeraren alde ebatziko da.
- Batzordeko idazkariak bileren aktak idatziko ditu, Batzordearen hurrengo bileran onartzeko. Akta onartu ondoren, idazkariak izenpetu egingo du Buruzagitzaren oniritziarekin. Udaleko Gizarte Zerbitzuetan gordeko dira aktak, eta batzordekideen esku egongo dira.
- Lan-taldeak sortu ahal izango dira, baldin eta gehiengoaren iritzirako gaiak aztertzeko beharrezkoak badira.
- Udalak beharrezko ikusten duen informazioa eta dokumentazio guztia aurretiaz eskainiko die batzordekideei.

**DATUAK**

Hasierako onespina	2016ko irailaren 29an
GAOn iragarkia:	2016ko urriaren 11n (193 zk.)
Alegazioak aurkezteko epea:	2016ko azaroaren 24an
GAOn testua:	2016ko abenduaren 19an (238 zk.)
Indarrean:	2017ko urtarrilaren 11n